

MIŠLjENjE
na Sporazum o poslovnoj saradnji u formiranju združene mreže bankomata
banaka članica BAMCARD BH mreže, a po zahtjevu banaka potpisnica

Sarajevo, april, 2013. godine

Broj: 01-26-7-03-4-I/13
Sarajevo, 04.04.2013. godine

Na osnovu člana 25. stav (1) tačka f) Zakona o konkurenciji („Službeni glasnik BiH“ br. 48/05, 76/07 i 80/09), a po zajednički podnesenom zahtjevu za davanjem mišljenja, zaprimljenom od strane Konkurencijskog vijeća dana 28.02.2013. godine pod brojem: 01-26-7-03-I/13, Konkurencijsko vijeće na 57. (pedesetsedmoj) sjednici održanoj dana 04.04.2013. godine, daje slijedeće

M I Š L J E N J E

Sporazum o poslovnoj saradnji u formiranju združene mreže bankomata banaka članica BAMCARD mreže (BH mreža) je u skladu s odredbama Zakona o konkurenciji.

O b r a z l o ž e n j e

Bosna Bank International d.d. Sarajevo, Investiciono-komercijalna banka d.d. Zenica, Privredna banka d.d. Sarajevo i Union banka d.d. Sarajevo (u daljem tekstu: Podnosioci zahtjeva) podnijeli su dana 28.02.2013. godine, zajednički Zahtjev Konkurencijskom vijeću (u daljem tekstu: Zahtjev) zaprimljen pod brojem 01-26-7-03-I/13, za davanje mišljenja o usaglašenosti „Sporazuma o poslovnoj saradnji u formiranju združene mreže bankomata banaka članica BAMCARD mreže (BH mreža)“, (u daljem tekstu: Sporazum o poslovnoj saradnji), sa Zakonom o konkurenciji („Službeni glasnik BiH“, br. 48/05, 76/07 i 80/09) (dalje u tekstu: Zakon).

Podnosilac je dana 08.03.2013. godine dostavio dopunu Zahtjeva podneskom broj:01-26-7-03-1-I/13.

Konkurencijsko vijeće je dana 13.03.2013. godine Podnosiocu zahtjeva dostavilo Zahtjev za uplatu administrativne takse u skladu sa Odlukom o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», br. 30/06 i 18/11).

Podnosioci zahtjeva dostavili su Konkurencijskom vijeću dokaz o uplati odgovarajuće administrativne takse, dana 13.03.2013.godine.

U Zahtjevu je navedeno da su Podnosioci zahtjeva zaključili Sporazum o poslovnoj saradnji, koji ima za cilj da svojim klijentima omogući pristup svakom od bankomata članica potpisnica istog, bez naknade, te da im na takav način pruži bolju i kvalitetniju uslugu.

Sporazum o poslovnoj saradnji stupio bi na snagu tek nakon dobijenog pozitivnog mišljenja Konkurencijskog vijeća o usklađenosti istog sa Zakonom.

Podnosioci u Zahtjevu također navode da je prema podacima Agencije za bankarstvo FBiH na dan 30.09.2012. godine učešće aktive banaka potpisnica Sporazuma o poslovnoj saradnji, na tržištu bankarskog sektora FBiH, iznosilo 6,39%.

Također je u Zahtjevu navedeno da je u Bosni i Hercegovini u 2011. godini (prema podacima Centralne Banke Bosne i Hercegovine – još uvijek nema podataka za 2012. godinu) bilo 1.202 bankomata, dok bi ukupan broj bankomata koji bi bili korišteni temeljem Sporazuma o poslovnoj saradnji, iznosio 70, što čini 5,82% od ukupnog broja bankomata u Bosni i Hercegovini.

U dopuni Zahtjeva Podnosioci navode da će svaka od članica potpisnica Sporazuma o poslovnoj saradnji, kao i do sada, potpuno autonomno i samostalno određivati cijene svojih usluga po pitanju kartica u skladu sa svojim sopstvenim poslovnim politikama i principima, te da predmetni sporazum na bilo koji način ne uređuje odnose banka po ovom pitanju.

Podnosioci zahtjeva također navode da svaka od članica potpisnica Sporazuma o saradnji će i dalje pojedinačno ostati u ugovornom odnosu sa BAMCARD d.d. Sarajevo, Trg Heroja 10/II, 71000 Sarajevo, kao procesnim centrom. Ovaj procesni centar prilagođava softvere svake banke potpisnice, te će svaka za sebe potpisivati posebne ugovore kojim će se regulisati, odnosno precizirati implementacija odredbi Sporazuma o poslovnoj saradnji za svaku od članica potpisnica samostalno, u smislu izmjena naknada iz međubankarskog poravnanja u korist banke vlasnika bankomata, a kako bi se omogućilo podizanje gotovine na zajedničkoj mreži bez naknade o čemu svjedoči nacrt Ugovora o korištenju ATM mreže priložen uz Zahtjev.

Analizom Sporazuma o poslovnoj saradnji, Konkurencijsko vijeće je ustanovilo:

- da banke potpisnice prihvataju učešće svojih postojećih instaliranih bankomata u zajedničkoj združenoj mreži bankomata banaka članica BAMCARD mreže u Bosni i Hercegovini;
- da je cilj Sporazuma o poslovnoj saradnji pružanje kvalitetnije usluge klijentima korisnicima VISA Electron kartice u vidu omogućavanja besplatnog podizanja gotovine na bankomatima banaka potpisnica predmetnog sporazuma;
- da je i ostalim bankama otvoren pristup predmetnom sporazumu, uz uslov da banka posjeduje najmanje 10 bankomata na kojima se transakcije procesiraju preko BAMCARD procesnog centra i uz suglasnost ostalih potpisnica;
- da je Sporazum o poslovnoj saradnji potpisan na period od 5 godina uz mogućnost produženja;
- da predmetni sporazum stupa na snagu ukoliko Konkurencijsko vijeće donese pozitivno mišljenje o usklađenosti njegovih odredbi sa Zakonom.

Članom 4. stav (1) Zakona, utvrđeno je, da se svaki ugovor, njegove pojedine odredbe ili prećutni dogovor, smatraju zabranjenim sporazumom ukoliko se odnose na:

- a) direktno ili indirektno utvrđivanje kupovnih i prodajnih cijena ili bilo kojih drugih trgovačkih uslova;
- b) ograničavanje i kontrolu tržišta;
- c) podjelu tržišta;
- d) primjenu različitih uslova za identične transakcije sa drugim privrednim subjektima, dovodeći ih u nepovoljan položaj u odnosu na konkurenciju;
- e) uslovljavanje druge strane da prihvati dodatne obaveze koje po svojoj prirodi nisu u vezi s predmetom sporazuma.

Na osnovu podataka navedenih u Zahtjevu, Konkurencijsko vijeće smatra da se odredbama Sporazuma o poslovnoj saradnji ne spriječava, ograničava niti narušava tržišna konkurencija u smislu člana 4. stav (1) Zakona.

Ukoliko dostavljeni podaci odstupaju od stvarnog činjeničnog stanja ovo mišljenje se ne može primijeniti.

Predsjednik

Gordana Živković

Dostavljeno:

- Podnosiocu zahjteva
- u spis
- arhiv Konkurencijskog vijeća